



DIKELUARKAN OLEH JABATAN MUFTI PERLIS

**PELIHARALAH DIRI DAN KELUARGA
DARI NERAKA**

(TEKS KHUTBAH JUMAAT 24 OKTOBER 2025 MASIHI / 2
JAMADIL AWWAL 1447 HIJRAH)

PELIHARALAH DIRI DAN KELUARGA DARI NERAKA

الْحَمْدُ لِلَّهِ نَحْمَدُهُ وَنُسْتَعِينُهُ وَنَسْتَغْفِرُهُ وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ أَعْمَالِنَا، مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ، أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى مُحَمَّدٍ وَعَلَى آلِهِ وَأَصْحَابِهِ وَمَنْ تَبِعَهُمْ بِإِحْسَانٍ إِلَى يَوْمِ الدِّينِ. يَا أَيُّهَا الَّذِينَ آمَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ. أَمَّا بَعْدُ، فَإِنَّ أَصْدَقَ الْحَدِيثِ كِتَابُ اللَّهِ، وَخَيْرَ الْهَدْيِ هَدْيُ مُحَمَّدٍ صَلَّى اللَّهُ عَلَيْهِ وَسَلَّمَ، وَشَرُّ الْأُمُورِ مُحَدَّثَاتُهَا، وَكُلُّ مُحَدَّثَةٍ بِدْعَةٌ، وَكُلُّ بِدْعَةٍ ضَلَالَةٌ، وَكُلُّ ضَلَالَةٍ فِي النَّارِ.

Sidang Jumaat Yang Dirahmati Allah Sekalian,

Marilah kita meningkatkan ketakwaan kepada Allah dengan bersungguh-sungguh melaksanakan segala perintah-Nya dan meninggalkan segala larangan-Nya. Khutbah pada hari ini bertajuk: **“PELIHARALAH DIRI DAN KELUARGA DARI NERAKA.”**

Sidang Jumaat Yang Dikasihi Allah Sekalian,

Neraka adalah tempat azab yang amat dahsyat, disediakan oleh Allah SWT untuk golongan yang kufur kepada-Nya, mendustakan rasul-rasul-Nya, dan melakukan dosa tanpa taubat. Gambaran ngeri mengenai neraka disebut dalam al-Quran dan hadis-hadis yang sahih sebagai peringatan agar manusia tidak lalai dan supaya segera bertaubat sebelum terlambat. Allah SWT berfirman:

يَا أَيُّهَا الَّذِينَ ءَامَنُوا قُوا أَنْفُسَكُمْ وَأَهْلِيكُمْ نَارًا وَقُودُهَا النَّاسُ وَالْحِجَارَةُ عَلَيْهَا مَلَائِكَةٌ غِلَاظٌ شِدَادٌ لَا يَعْصُونَ اللَّهَ مَا أَمَرَهُمْ وَيَفْعَلُونَ مَا يُؤْمَرُونَ ﴿٦﴾

Maksudnya: **“Wahai orang-orang yang beriman! Peliharalah diri kamu dan ahli keluarga kamu daripada api neraka yang bahan bakarnya adalah manusia dan batu; neraka itu dijaga oleh malaikat yang kasar lagi keras, yang tidak menderhakai Allah terhadap apa**

yang diperintahkan-Nya kepada mereka dan mereka tetap melakukan segala yang diperintahkan.” (Surah At-Tahrīm, Ayat 6)

Ayat ini memberi amaran tegas kepada orang beriman supaya menjaga diri dan keluarga daripada menjadi penghuni neraka dengan melaksanakan perintah Allah dan menjauhi larangan-Nya. Ia menuntut setiap Muslim untuk mendidik ahli keluarganya agar tidak terjerumus dalam dosa yang membawa kepada azab Allah.

Ayat ini juga menggambarkan betapa dahsyatnya api neraka yang bahan bakarnya terdiri daripada manusia dan batu, serta dijaga oleh malaikat yang sangat keras dalam melaksanakan perintah Allah SWT. Oleh itu, setiap mukmin wajib berusaha menyelamatkan dirinya dan keluarganya daripada azab neraka dengan memperkukuh iman, beramal soleh, dan segera bertaubat daripada segala dosa sebelum datangnya saat yang tidak mungkin dapat dielakkan.

Sidang Jumaat Yang Dihormati Sekalian,

Islam telah mengajarkan kepada kita beberapa amalan yang dapat menyelamatkan diri dan keluarga daripada azab neraka. Marilah kita meneliti amalan-amalan yang menjadi sebab keselamatan di dunia dan di akhirat kelak. Antara amalan tersebut ialah:

Pertama: Mentauhidkan Allah SWT. Tauhid merupakan inti ajaran seluruh para rasul yang diutuskan oleh Allah SWT untuk membimbing manusia agar menyembah hanya kepada-Nya. Tanpa tauhid yang tulus dan murni, segala amal kebaikan tidak akan diterima di sisi Allah SWT.

Oleh itu, perkara yang paling utama dalam kehidupan seorang Muslim ialah memastikan akidahnya sentiasa bersih daripada sebarang bentuk syirik. Hanya dengan mentauhidkan Allah SWT dan menolak segala sekutu bagi-Nya, seseorang itu akan terselamat daripada azab neraka serta memperoleh rahmat dan keselamatan di dunia dan di akhirat. Allah SWT berfirman:

وَإِذْ قَالَ لُقْمَانُ لِأَبْنِهِ ۖ وَهُوَ يَعِظُهُ ۚ يَبْنَىٰ لَا تُشْرِكْ بِاللَّهِ ۖ إِنَّ الشِّرْكَ لَظُلْمٌ عَظِيمٌ ﴿١٣﴾

Maksudnya: ***"Dan (ingatlah) ketika Luqman berkata kepada anaknya, semasa dia memberi nasihat kepadanya: Wahai anak kesayanganku! Janganlah engkau mempersekutukan Allah (dengan sesuatu pun), sesungguhnya perbuatan syirik itu adalah satu kezaliman yang amat besar."*** (Surah Luqmān, Ayat 13)

Ayat ini menjelaskan bahawa perbuatan syirik merupakan sebesar-besar kezaliman kerana ia menafikan hak Allah sebagai Tuhan yang mencipta, mentadbir, serta satu-satunya yang berhak disembah. Justeru, untuk memelihara diri dan keluarga daripada azab neraka, setiap Muslim hendaklah menanam dan memelihara tauhid dalam jiwa mereka, serta menjauhkan diri daripada segala bentuk kesyirikan dalam ibadah, sama ada dalam doa, tawakal, cinta, rasa takut, atau pun pengharapan.

Kedua: Mendirikan solat. Seorang bapa yang tidak menyuruh dan tidak memastikan ahli keluarganya menunaikan solat merupakan seorang bapa yang telah mengabaikan tanggungjawab besar yang diperintahkan oleh Allah SWT, sekalipun dia telah menyediakan segala keperluan hidup duniawi kepada mereka. Allah SWT berfirman:

يَبْنِيْ اَقِمِ الصَّلَاةَ ﴿١٧﴾

Maksudnya: “*Wahai anakku, dirikanlah solat.*” (Surah Luqmān, Ayat 17)

Ayat ini menjelaskan bahawa mendirikan solat adalah perintah utama yang wajib ditegakkan dalam kehidupan setiap Muslim, bahkan menjadi asas kepada seluruh amal kebaikan. Meninggalkan solat bukan sekadar satu kelalaian, tetapi merupakan perbuatan yang mengundang kemurkaan Allah SWT dan boleh menjerumuskan seseorang ke dalam azab neraka yang amat pedih.

Maka setiap Muslim hendaklah memastikan dirinya dan keluarganya menjaga solat dengan penuh khusyuk dan istiqamah, kerana solatlah yang membezakan antara iman dan kufur, serta menjadi penyelamat daripada azab neraka.

Sidang Jumaat Yang Dikasihi Allah Sekalian,

Ketiga: Melaksanakan amar makruf dan nahi mungkar. Seorang suami yang beriman hendaklah memikul tanggungjawab untuk membimbing serta memelihara diri dan ahli keluarganya agar tidak terjerumus dalam perbuatan keji dan mungkar yang boleh menjerumuskan dirinya dan keluarganya ke dalam api neraka.

Keluarga merupakan amanah besar yang akan dipersoalkan oleh Allah SWT pada hari akhirat kelak. Oleh itu, seorang suami wajib memastikan isteri dan anak-anaknya hidup dalam ketaatan

kepada Allah SWT agar mereka terselamat daripada azab neraka dan memperoleh keredhaan-Nya. Allah SWT berfirman:

وَأْمُرْ بِالْمَعْرُوفِ وَأَنْهَ عَنِ الْمُنْكَرِ ﴿١٧﴾

Maksudnya: **"Dan suruhlah (manusia) mengerjakan kebaikan, serta laranglah (mereka) daripada melakukan kemungkaran."** (Surah Luqmān, Ayat 17)

Ayat ini menegaskan bahawa amar makruf dan nahi mungkar adalah tanggungjawab utama setiap Muslim, khususnya ketua keluarga. Ia bukan sekadar tugas para ulama atau pemimpin, bahkan merupakan kewajipan setiap mukmin yang menginginkan keselamatan diri dan keluarganya daripada kemurkaan Allah SWT. Seorang Muslim tidak hanya boleh menjadi baik pada dirinya sendiri sahaja, tetapi hendaklah juga memperbaiki orang lain.

Oleh itu, seorang suami yang beriman hendaklah menjadi contoh terbaik dalam ketaatan kepada Allah SWT. Dia perlu menasihati keluarganya dengan hikmah, menegur dengan penuh kasih sayang, serta memastikan rumah tangganya sentiasa berada dalam suasana iman, ilmu, dan takwa. Inilah keluarga yang diberkati dan dilindungi oleh Allah SWT daripada azab neraka serta dihimpunkan bersama dalam syurga yang penuh kenikmatan.

Keempat: Sabar dalam perjuangan. Sifat sabar merupakan kekuatan utama dalam mempertahankan iman serta menjadi asas kejayaan dalam perjuangan menegakkan agama Allah SWT. Sabar bukan sekadar menahan diri daripada marah atau bersedih, tetapi merangkumi keteguhan jantung hati dalam mentaati perintah Allah, kesungguhan menjauhi maksiat, serta ketabahan menghadapi ujian hidup dengan penuh redha dan keimanan. Sifat sabar inilah yang memelihara diri dan keluarga daripada keputusasaan, mendekatkan mereka kepada rahmat Allah SWT, serta menjauhkan mereka daripada azab neraka. Allah SWT berfirman:

وَأَصْبِرْ عَلَىٰ مَا أَصَابَكَ ﴿١٧﴾

Maksudnya: **"Serta bersabarlah terhadap apa yang menimpamu."** (Surah Luqmān, Ayat 17)

Ayat ini menjelaskan bahawa sabar merupakan sifat penting yang wajib dimiliki oleh setiap mukmin, khususnya ketika berjuang menegakkan kebenaran dan memelihara ahli keluarga daripada kebinasaan. Seseorang yang sabar dalam memperjuangkan agama, sabar menghadapi

ujian dan kesulitan hidup, serta sabar menahan diri daripada maksiat, akan memperoleh ganjaran yang besar di sisi Allah SWT. Dengan sifat sabar inilah seorang mukmin mampu istiqamah dalam membimbing keluarganya menuju ketaatan dan keselamatan daripada azab neraka.

Kelima: Beradab dan berakhlak baik terhadap sesama manusia. Islam mengajar umatnya agar hidup dengan adab dan akhlak yang mulia terhadap semua manusia. Adab yang baik bukan sekadar pada tutur kata, tetapi juga dalam perbuatan, sikap, dan cara bergaul. Seorang mukmin yang beradab akan menjaga lisannya daripada menyakiti orang lain, tidak sombong ketika diberi nikmat, dan tidak pula menghina orang yang kurang daripadanya. Allah SWT menegaskan dalam firman-Nya:

وَأَقْصِدْ فِي مَشْيِكَ وَأَغْضُضْ مِنْ صَوْتِكَ إِنَّ أَنْكَرَ الْأَصْوَاتِ لَصَوْتُ الْحَمِيرِ ﴿١٩﴾

Maksudnya: *“Dan sederhanakanlah langkahmu serta rendahkanlah suaramu; sesungguhnya seburuk-buruk suara ialah suara keldai.”* (Surah Luqmān, Ayat 19)

Ayat ini mengajar kita supaya beradab dalam tingkah laku dan berbicara dengan lemah lembut. Adab yang baik bermula dalam diri dan keluarga. Apabila seseorang menjaga adab dan akhlaknya, dia sebenarnya sedang melaksanakan perintah Allah untuk memelihara diri dan keluarganya daripada api neraka. Maka, mendidik keluarga dengan akhlak yang baik adalah sebahagian daripada usaha menyelamatkan mereka daripada azab Allah.

Sidang Jumaat Yang Dimuliakan,

Peliharalah diri dan keluarga daripada api neraka dengan memperkukuh keimanan, mendirikan solat, menyeru kepada kebaikan, menjauhi kemungkaran, bersabar menghadapi ujian, serta menghiasi diri dan rumah tangga dengan akhlak yang mulia. Janganlah kita lalai dengan nikmat dunia sehingga mengabaikan tanggungjawab terhadap agama, kerana keluarga yang dibina atas dasar takwa akan menjadi sumber keberkatan di dunia dan penyelamat di akhirat. Sesungguhnya kejayaan yang hakiki ialah apabila kita dan ahli keluarga terselamat daripada azab neraka serta dikurniakan syurga yang penuh kenikmatan oleh Allah SWT.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ.

KHUTBAH KEDUA

الْحَمْدُ لِلَّهِ الَّذِي أَنْزَلَ عَلَى عَبْدِهِ الْكِتَابَ وَلَمْ يَجْعَلْ لَهُ عِوَجًا. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ. اَللّهُمَّ صَلِّ وَسَلِّمْ وَبَارِكْ عَلَى مُحَمَّدٍ وَعَلَى آلِهِ وَصَحْبِهِ أَجْمَعِينَ، أَمَّا بَعْدُ: فَيَا أَيُّهَا الْمُسْلِمُونَ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat Yang Dikasihi Allah Sekalian,

Sesungguhnya Allah SWT telah mempermudah bagi hamba-Nya untuk melakukan kebaikan. Salah satu amalan yang sangat mudah dilakukan tetapi memberi ganjaran ialah senyuman kepada sesama manusia. Rasulullah SAW bersabda:

تَبَسُّمُكَ فِي وَجْهِ أَخِيكَ صَدَقَةٌ

Ertinya: *“Senyummu kepada saudaramu adalah sedekah.”* (Hadis Sahih, Riwayat At-Tirmizi)

Hadis ini jelas menunjukkan bahawa sesuatu yang nampak kecil seperti senyuman termasuk dalam bentuk sedekah yang diterima oleh Allah SWT. Senyuman bukan sahaja membuat jantung hati kita sendiri rasa tenang dan gembira, malah memberi kesan yang baik kepada orang yang melihatnya. Dengan tersenyum, ketegangan boleh mencair, hubungan menjadi lebih mesra, dan suasana di sekeliling menjadi lebih harmoni.

Senyuman juga adalah amalan yang mudah dilakukan, tidak memerlukan harta, tenaga, atau masa yang banyak, tetapi mampu mencetuskan perubahan yang besar. Bayangkan, hanya dengan meluahkan senyuman, kita mampu menghilangkan rasa sedih seseorang, membuka ruang pergaulan yang baik, dan menyebarkan kebaikan dalam masyarakat.

Marilah kita menjadikan senyuman sebagai amalan harian. Dengan senyuman, kita bukan sahaja menenangkan diri sendiri tetapi juga memberi kegembiraan kepada orang lain. Sesungguhnya, amalan mudah ini mampu mengeratkan hubungan sesama manusia, menimbulkan kasih sayang, dan menyebarkan kebaikan dalam setiap lapisan kehidupan.

Sidang Jumaat Yang Dihormati Sekalian,

Sesungguhnya, Allah SWT berfirman dalam surah Al-Ahzab Ayat 56:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

Maksudnya: “*Sesungguhnya Allah dan para malaikat berselawat ke atas Nabi, maka wahai orang-orang yang beriman hendaklah kamu berselawat dan salam ke atas Nabi*”.

اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ

وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي

الْعَالَمِينَ إِنَّكَ حَمِيدٌ مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ،

الْأَحْيَاءِ مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَقَاضِي الْحَاجَاتِ.

Ya Allah!, Ya Ghaffar! Engkau ampunilah seluruh kaum muslimin dan mukminin sama ada yang hidup ataupun yang telah mati. Ya Allah! Engkau berikan petunjuk hidayah serta rahmat-Mu kepada kami sekalian hamba-hamba-Mu dan kepada pemimpin kami terutamanya Raja pemerintah Negeri Perlis Tuanku Syed Sirajuddin Ibni Al-Marhum Tuanku Syed Putra Jamalullail dan Raja Muda Perlis Tuanku Syed Faizuddin Putra Ibni Tuanku Syed Sirajuddin Jamalullail serta kaum kerabat Baginda, supaya sentiasa beramal dengan kitab-Mu dan sunnah nabi-Mu. Engkau lanjutkanlah usia baginda berdua dalam keadaan selamat, sihat sejahtera dan menegakkan pemerintahan yang adil lagi diredhai oleh-Mu.

Ya Allah!, Ya Rahman! Kami memohon kepada-Mu dengan segala kerendahan diri sebagai hamba-Mu. Engkau indahkanlah akhlak kami. Engkau perbaikilah pergaulan antara kami. Engkau jadikanlah kami umat Islam yang bermentaliti kelas pertama dalam tindakan. Engkau peliharalah kami dari bersifat lemah, malas, berfikiran sempit dan buruk budi pekerti.

Ya Allah!, Ya Rahim! Engkau limpahkanlah Negeri Perlis ini dengan keberkatan, bimbinglah penduduknya kepada amalan soleh yang Engkau redha. Penuhi jiwa kami dengan mencintai agama-Mu.

Ya Allah!, Ya Naṣīr! Engkau berikan pertolongan-Mu kepada saudara-saudara kami yang ditindas di mana pun mereka berada khususnya di Palestin.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ. وَصَلَّى اللَّهُ عَلَى نَبِيِّنَا
مُحَمَّدٍ وَالْحَمْدُ لِلَّهِ رَبِّ الْعَالَمِينَ.